



**Broj: 02-11-758/24.**  
**Dana, 27.09.2024.**

Na osnovu člana 39 Statuta Općine Zavidovići, ("Službeni glasnik Općine Zavidovići" broj 5/08 i 5a/08), Programa utroška sredstava sa "Transfera za razvoj poljoprivrede" planiranog u Budžetu Grada Zavidovići za 2024 godinu, broj: 08-11-758/24. od 24.09.2024. godine Gradonačelnik raspisuje:

**JAVNI POZIV**  
**za podnošenje zahtjeva za dodjelu gradskog podsticaja sa "Transfera za razvoj poljoprivrede" planiranog u Budžetu Grada Zavidovići za 2024. godinu**

U Budžetu Grada Zavidovići za 2024. godinu na poziciji Transfer za razvoj poljoprivrede predviđena su sredstva u iznosu od 88.000,00 KM.

Ovim programom se utvrđuju vrste poljoprivredne proizvodnje za koje se dodjeljuju bespovratna novčana sredstva (u daljem tekstu: gradski podsticaji), opći i posebni uslovi, kriteriji i postupak dodjele, te prava i obaveze korisnika gradskih podsticaja.

**1. Kriteriji za raspodjelu sredstava odobrenih Budžetom Grada Zavidovići, sa Transfera za razvoj poljoprivrede, u iznosu od 88.000,00 KM**

1.1. Podsticaj za držanje ženskih rasplodnih grla goveda	30 000,00 KM
1.2. Podsticaj za proizvodnju povrća zasijanog ili zasađenog, na otvorenom, u proljeće 2024. godine	15 000,00 KM
1.3. Podsticaj za proizvodnju povrća u plastenicima u 2024 godini	8 000,00 KM
1.4. Podsticaj za investicije u poljoprivredi	5 000,00 KM
1.5. Podsticaj za proizvodnju žitarica	27.000,00 KM
1.6. Podsticaj za postojeće nasade jagodičastog i bobičastog voća	3.000,00 KM

---

UKUPNO: 88.000,00 KM

**OPĆI USLOVI:**

- Da podnosilac zahtjeva za podsticaj ima prebivalište kao fizičko lice ili sjedište za pravna lica na teritoriji Grada Zavidovići.

- Podsticaj mogu ostvariti sva pravna i fizička lica koja su upisana u Registar poljoprivrednih gazdinstava i Registar klijenata u Zavidovićima kao nositelji poljoprivredne proizvodnje izuzetno i u opravdanim slučajevima kao članovi PG-a umjesto nositelja.
- Podsticaj se može ostvariti samo za proizvodnje koje su prijavljene u RPG u Gradu Zavidovićima a koje se odnose na proizvodnju u stočarskoj ili biljnoj proizvodnji, ukoliko nije drugačije naznačeno u javnom pozivu.
- Podsticaj ne mogu ostvariti lica koja su u ranijem periodu dobila uz posredovanje Grada Zavidovićima platenike i drugu opremu i mehanizaciju i istu neopravdano ne koriste na vlastitom gazdinstvu pet godina nakon dodjele pomenute pomoći u poljoprivredi.
- Podsticaj ne mogu ostvariti lica koja za proizvodnje i investicije iz ovog programa imaju pravo ostvarivanja podsticaja na kantonalnom i federalnom nivou, kao ni članovi gradske komisije za utvrđivanje ispunjenosti uslova za dodjelu podsticaja.
- Korisnici sredstava iz ovog programa, koji su pravna lica i obrtnici, dužni su dostaviti potvrdu nadležne porezne uprave da nemaju dospjelih, a neizmirenih poreznih obaveza.
- **Zahtjevi za podsticaj, sa propisanom dokumentacijom, dostavljaju se na protokol Grada Zavidovićima od 30. septembra do 18. oktobra 2024 godine.**
- Svi korisnici podsticaja moraju dostaviti pismene dokaze o proizvodnji ili nabavci (račun, fiskalni račun, ugovor, otpremnica, pismenu izjavu i slično), što je preciznije utvrđeno posebnim uslovima.

## **POSEBNI USLOVI:**

### **2.1. Podsticaj za držanje ženskih rasplodnih grla goveda.**

Pravo na podsticaj za držanje ženskih rasplodnih grla imaju poljoprivredni proizvođači koji u vlastitom ili zakupljenom objektu odnosno na imanju, drže minimalno dvije, a maksimalno sedam rasplodnih krava starosti preko 24 mjeseca, a koja su prijavljena u RPG i RK na ime podnosioca zahtjeva. Umjesto jedne krave starosti 24 mjeseca priznaće se i jedna junica starosti preko 12 mjeseci u ukupnom broju grla za ostvarivanje podsticaja.

Visina podsticaja iznosi 200,00 KM po prijavljenom grlu goveda.

Svi podnosioci podsticaja koji imaju veći broj grla stoke od maksimalnog broja iz ovog programa nemaju pravo na gradski podsticaj i upućuju se na ostvarivanje podsticaja putem kantonalnog i federalnog Ministarstva za poljoprivredu, šumarstvo i vodoprivredu.

Na javni poziv se dostavlja popunjen zahtjev koji mora da sadrži:

- Ime, prezime, adresa, broj telefona, jmbg;
- Broj transakcijskog/tekućeg računa i naziv banke u kojoj je otvoren;
- Broj grla prijavljenih za poticaj sa kategorijama grla,
- Broj poljoprivrednog gazdinstva i broj klijenta;
- Ovjerene kopije pasoša za grla goveda, sa brojevima rasplodnih grla i starostima grla.
- Ovjerena izjava da rasplodna grla za koja je ostvaren podsticaj neće biti prodana ili otuđena u periodu od najmanje dvanaest mjeseci od dana dobijanja podsticaja

## **2.2. Podsticaj za proizvodnju povrća zasijanog ili zasađenog na otvorenom u proljeće 2024. godine.**

Pravo na podsticaj imaju sva pravna i fizička lica koja su u proljeće 2024. godine izvršili sjetvu ili sadnju povrća samo za slijedeće kulture: kornišona, paradajza, paprike, crvenog i bijelog luka i graha, na površini od minimalno 0,05 ha (pola duluma) do maksimalno 0,5 ha, (pet duluma) po jednoj kulturi, kao i organizovana proizvodnja krompira na površini od minimalno 0,1 ha, (jedan dulum). Priznati će se sjetva ili sadnja koja je prijavljena u RPG-u u 2024 godini Grada Zavidovića za svaku poljoprivrednu kulturu posebno.

Visina podsticaja iznosi 200,00 KM po 0,1 ha, (dulumu).

Na Javni poziv se dostavlja popunjen zahtjev koji mora da sadrži:

- Ime, prezime, adresa, broj telefona, jmbg, zasađena površina;
- Broj transakcijskog/tekućeg računa i naziv banke u kojoj je otvoren;
- Naziv parcele, broj katastarske čestice, koja je prijavljena u RPG i RK na ime podnosioca zahtjeva.
- Broj poljoprivrednog gazdinstva i broj klijenta;
- Fiskalni račun i poresku fakturu za kupljeno sjeme ili presadnice izdat na ime podnosioca zahtjeva a za organizovanu proizvodnju i ugovor o zasnivanju proizvodnje i/ili otkupu povrća koje je zasijano ili zasađeno. Lica koja su zasijala ili zasađila povrće od sjemena porijeklom sa vlastitog gazdinstva priložiće ovjerenu izjavu o korištenju vlastitog sjemena u proizvodnji povrća.

## **2.3. Podsticaj za proizvodnju povrća u plastenicima u 2024 godini.**

Pravo na podsticaj imaju poljoprivredni proizvođači koji posjeduju plasteničku proizvodnju povrća, paradajza i paprike na površini minimalno 100 m<sup>2</sup> do maksimalno 400 m<sup>2</sup> i da su istu proizvodnju prijavili u RPG u Gradu Zavidovići. Kroz ovaj vid podrške priznaće se intenzivna proizvodnja povrća zasijanog ili zasađenog sa minimalno 50 % hibridnih kultura povrća.

Visina podsticaja iznosi 1,00 KM/m<sup>2</sup> površine plastenika.

Lica koja posjeduju više od 400 m<sup>2</sup> plasteničke proizvodnje nemaju pravo na gradski podsticaj za plasteničku proizvodnju i upućuju se na ostvarivanje podsticaja putem kantonalnog Ministarstva za poljoprivredu, šumerstvo i vodoprivredu.

Na Javni poziv se dostavlja popunjen zahtjev koji sadrži:

- Ime, prezime, adresa, broj telefona, jmbg, ukupna površina plastenika;
- Fiskalni računi i otpremnice za kupljeno sjeme ili presadnice povrća,
- Broj transakcijskog/tekućeg računa i naziv banke u kojoj je otvoren;
- Naziv parcele, broj katastarske čestice gdje je plastenička proizvodnja, koja je prijavljena u RPG i RK na ime podnosioca zahtjeva.
- Broj poljoprivrednog gazdinstva i broj klijenta;

## **2.4. Podsticaj za investicije u poljoprivredi, kupovinu poljoprivrednih mašina i priključaka i gradnju štala za smještaj stoke.**

Podsticaj će se dodjeljivati poljoprivrednicima koji imaju proizvodnju u nekoj od primarnih poljoprivrednih proizvodnji hrane. Proizvodnja mora biti prijavljena u RPG-u u Gradu Zavidovići

za 2024 godinu. Podsticaj će se dodjeljivati za kupljene novu poljoprivrednu mehanizaciju, priključke i opremu sa iznosima na računima od 500,00 KM do 2.000,00 KM vrijednosti sa obračunatim PDV-om za kupljenu mehanizaciju i/ili priključke. Visina podsticaja iznosi 20 % od ukupnog iznosa sa dostavljenih računa za kupljene mašine i priključke. Takođe, podsticaj mogu ostvariti i lica koja su izgradila štalu u periodu maj 2023 do septembra 2024 godine i za istu su pribavila odobrenje za građenje. Visina podsticaja iznosi najviše 1.000,00 KM po jednom klijentu i to u skladu sa raspoloživim sredstvima

Uz zahtjev za podsticaj prilaže se i ovjerena kopija računa za kupljenu mehanizaciju, priključke i opremu, kao i kopiju odobrenja za građenje i račune za izgradnju štale izdatih na ime kupca koji je nosioc u RPG-u u Gradu Zavidovići.

## **2.5. Podsticaj za proizvodnju žitarica (kukuruz, pšenice, ječma, zobi, raži, tritikalea na min. 0,2 ha, (dva duluma) do maksimalno 2,0 ha, (dvadeset duluma).**

Pravo na podsticaj imaju sva pravna i fizička lica koja su upisana u RPG u Gradu Zavidovići, a zasijala su žitarice u jesen 2023. godine kao i u proljeće 2024. godine. Podsticaj se dodjeljuje na površinu od minimalno 0,2 ha do maksimalno 1,0 ha (od 2 do 10 duluma) i koja su proizvodnju žitarica prijavila u registru u Gradu Zavidovići. Visina podsticaja iznosi 50,00 KM po 0,1 ha (dulumu), površine.

Na Javni poziv se dostavlja popunjen zahtjev koji sadrži:

- Ime, prezime, adresa, broj telefona, jmbg, zasijane površine;
- Broj transakcijskog/tekućeg računa i naziv banke u kojoj je otvoren;
- Naziv parcele ili parcela, broj katastarske čestice, koja je prijavljena u RPG i RK, a ukoliko iz opravdanih razloga nije prijavljena u registrima uz zahtjev priložiti dokaz o vlasništvu ili pravu korištenja zemljišta,
- Broj poljoprivrednog gazdinstva i broj klijenta;
- Fiskalni račun izdat na ime podnosioca zahtjeva za kupljeno sjeme ili fiskalni račun bez imena podnosioca zahtjeva i poreznu fakturu ili otpremnica izdata na ime podnosioca zahtjeva, kao i drugi dokazi.

## **2.6. Podsticaj za postojeće nasade jagodičastog i bobičastog voća zasadenog u proljeće 2022. godini i ranije.**

Pravo na podsticaj imaju lica koja su u 2024. godini prijavila proizvodnju jagodičastog i bobičastog voća u RPG u Grad Zavidovići, koja imaju nasad jagodičastog i/ili bobičastog voća podignut u proljeće 2022. godine i ranije na površini od jednog duluma do maksimalno 2 duluma i imaju ugovor o otkupu voća zaključen sa određenim pravnim licem.

Visina podsticaja iznosi 100 KM po jednom dulumu površine nasada voćnjaka.

Na Javni poziv se dostavlja popunjen zahtjev uz koji će se priložiti:

- ovjerena kopija Ugovora sa otkupljivačem,
- Potvrda o otkupljenoj količini jagodičastog i bobičastog voća u 2024. godini.

## OBAVEZE SVIH KORISNIKA NAKON OSTVARIVANJA PODSTICAJA:

Svaki korisnik podsticaja dužan je dobijena sredstva namjenski iskoristiti. Ukoliko se konstatuje da je korisnik podsticaja dobio sredstva na osnovu netačnih podataka ili ako su nenamjenski utrošena, korisnik gubi pravo da konkuriše za bilo koju vrstu podsticaja u razdoblju od pet godina, a nenamjenski utrošena ili prevarom dobijena sredstva će morati vratiti. Ovu kontrolu će vršiti Komisija koju formira Gradonačelnik nakon dodjele podsticajnih sredstava.

Evidenciju svih korisnika podsticajnih sredstava iz budžeta Grada Zavidovići i podatke o namjenskom utrošku sredstava će voditi Služba za upravu poljoprivrede, vodoprivrede i komunalnih poslova.

### Završne odredbe:

- Posebna Komisija imenovana od Gradonačelnika će odlučivati o usklađenosti zahtjeva sa programom, izvršenim upisima poljoprivrednika, korisnika Programa, u RPG i RK i prijavi poljoprivrednih površina u RPG i RK na koje se traži podsticaj, te će po nalogu Gradonačelnika izvršiti obilazak terena i donijeti prijedlog Zaključka o isplati podsticaja.
- Sve evidencije o korisnicima podsticaja vodi Služba za upravu poljoprivrede, vodoprivrede i komunalnih poslova.
- Ukoliko dođe do povećanja iznosa sredstava na tekućem transferu za razvoj poljoprivrede kroz rebalans Budžeta Grada Zavidovići povećati će se iznosi sredstava i po stavkama za podrške iz ovog Programa.
- Ukoliko se pojavi veći broj kandidata koji ispunjavaju uslove za podsticaje po određenim modelima ili se umanju iznos sredstava na tekućem transferu za razvoj poljoprivrede, ukupan iznos podsticaja predviđen programom dijeli se na ukupan broj prijavljenih kandidata koji ispunjavaju uslove, tako da iznos podsticaja po jedinici mjere u tom slučaju može biti i manji nego što je predviđen.
- Ukoliko određeni iznos podsticaja po nekom od modela ostane neiskorišten, Gradonačelnik zadržava pravo preraspodjele novčane sume na neki od drugih modela podsticaja.
- Obrazac zahtjeva za podsticaje može se preuzeti na info-pultu Grada Zavidovići.
- Gradonačelnik zadržava pravo da umanju iznos podsticaja po pojedinim ili svim modelima ukoliko izvršenje budžeta bude manje od planiranog.
- Određuje se limit po jednom korisniku podsticaja od 2.000,00 KM kao maksimalni iznos za ostvarivanje podsticajnih sredstava po svim modelima podsticaja iz Budžeta Grada Zavidovići za 2024.. Godinu.

Obradio: Hadžić Ibro,

Kontrolisao: Bašić Izet,



GRADONAČELNIK  
doc.dr. Hašim Mujanović